

Äs hed alls schon ämal gään

Ä Tragödiä in drii Äkt ohni Epilog



Pärsonä:

ERSCHTÄ Chünschtlär: ovals Gsicht, chleinä Schpitzbaart odär än andäri Art va gäpflägtäm Baartwuxs. Ä Maa mid ruähignä Bewegigä. Modern aagleit. Einzigartigä Stiil. Wortkarg. Redät lislil und tuäd jedäs Wort abwägä.

ZWEITÄ Chünschtlär: Än schlankä Maan mid churzäm Haar. Tüüri, gschmackvolli Schuä und äs värwäschäs Tischört. Än Schwärmär. In imschä Augä schpiäglät schi Humor.

DRITTÄ Chünschtlär: Än chaal gschornnä Maan, wa mä z'Altär und där Bruäf nid naa äm Üssärä beschtimä chan. Luägät ämal lengwiilig-suur, ämal näiv uss där Wäsch.

VIÄRTÄ Chünschtlär: Än chnochigä Jüngling in ordäli uusgsuächtär, modischär Chünschtlärchleidig. Sälbschtsichär. Mä ärchennt imschä innär chünschtlärisch Schpanig. Sit zwei Tag nid räsiärt.

AKT I

Di Tragödiä (äs ischt än Tragödiä) spillt m Prättigau am Aafang vam 21. Jahrhundert. Ma gseed än chleinä Gartä. Äs ischt Ende April und ehär chalt. Diä viär Chünschtlär, wa än lildig für än Uusschtellig irä wichtigä Galerii übärcho händ, schtu-diäränd übär äs nüüs Chunschtpjekt naa. Schi wettänd äs was Nüüs zeigä, odär no bessär äs was Revoluzionärs, ganz wiäs z'modernistischä Paradigmä var Chunscht äbä värlangt.

Schi hockänd uf ämä nidrigä Bank zwüscht jungnä Öpfälbömm. Vornä scheid än chleinä viäreggigä Tisch, druuf än Äschäbächär und zwei Päckli Zigärettä. Schi rauchänd.

ERSCHTÄ: - Was söllämär denn jetz tuän?

VIÄRTÄ: - Was chönntämä da no tuän?

DRITTÄ: - Da?

VIÄRTÄ: - Da odär sus äswo. Äs muäss nid umbedingt da siin.

DRITTÄ (*blaast där Rauch var Zigärettä uus*): - Hmm.

VIÄRTÄ (*wiä imä Vortrag*): - Asä, äs hed alls schon ämal gään.

DRITTÄ: - Und wenn... und wemär dän Gartä da umgrabä würtänd?

ZWEITÄ: - Neii...

VIÄRTÄ: - Abär für was denn?

ZWEITÄ (*fallt mä ins Wort*): - Äs geid um dä Zämmähang.

ERSCHTÄ: - Das heds schon gään.

ZWEITÄ: - Preziis, das heds schon gään.

VIÄRTÄ: - Das heds schon gään, (*beschtetigänd*) abär...

DRITTÄ (*ladschi nid beirä*): - Umgrabä...

VIÄRTÄ: - Miär chommänd ä biz vam Teemä ab.

DRITTÄ: - Vāwanä chommämär ab?

VIÄRTÄ (*düütlihär*): - Vam Teemä.

ZWEITÄ: - Abär an was deichscht?

DRITTÄ: - An Chunsch.

ZWEITÄ: - Ja, dass weiss i doch. Abär wit du JETZ grabä?

DRITTÄ: - Nei, i meinä...asä guät (*är hed offäsichtli äs eigäs Konzept was das «Teemä» aagäid, gid schi abär jetz gschlagä*)

DRITTÄ: - Asä guät, vömär widr va vornä an.

ZWEITÄ: - Guät.

VIÄRTÄ: - Abär wiä denn? Äs hed ja alläs schon ämal gään!

(Driisg Sekundä lang sägäntsch nüüd)

DRITTÄ *(als obär rezitiärä teeti)*: - Mä chönnti äs abstrakts Bild malä...

ZWEITÄ: - Übärhopt chönntämä äs Bild malä, abär...

ERSCHTÄ: - Mä chönnti äs Bild malä, ja...

(luägäntsch an und fünd aa lachä.)

VIÄRTÄ: - Das heds schon gään *(engültig)*.

VIÄRTÄ: - Abär was für äs Bild?

ZWEITÄ: - Ja, was für eis?

DRITTÄ: - Neii...*(är schnuuzät uus vor lachä)*.

ZWEITÄ *(hed gwüss nüüd vüschändä)*: - Än Hund?

ERSCHTÄ: - Chönd iär äs Ross malä?

DRITTÄ: - *(Glächtär)* Äs Ross?

ZWEITÄ: - I chans. Abär äs muäss im Wassär stahn.

DRITTÄ *(zu schi sälbär)*: - Nei, das is nid.

VIÄRTÄ: - Bis zu dän Ohrä. Äs muäss bis zu dän Ohrä im Wassär stahn. Denn zeichni eu äs Ross...

DRITTÄ: - Wüsstär was? Iär sid hoffnigslosi Fäll. Iär sid nid im Stand, eu äswas uuszdeichä.

VIÄRTÄ: - Ja äbä. Miär müänd nisch äswas Nüüschi uuszdeichä.

ZWEITÄ: - Äswas. Asä äswas, waas no nid gää hed.

VIÄRTÄ: - Ja.

ZWEITÄ: - Preziis.

(Schwiigä)

DRITTÄ: - Vilicht chönntämär äs Viäregg malä, vor mä Hindärgrund.

VIÄRTÄ: - Nei, das heds schon gään.

ZWEITÄ: - Ehmm...*(nadänkläch)* miär chönntänd äs Viäregg und ä Chreis malä...

DRITTÄ: - Nei, was deichsch au?

VIÄRTÄ: - Nei, ä Chreis imä Viäregg... und um z Viäregg zringum noch äswas?

ZWEITÄ: - Zringum?

VIÄRTÄ: - Chönnti um z Viäregg zringum äswas sin?

DRITTÄ: - I hans! Um z Viäregg zringum äs Driiegg. Und än Chreis.

VIÄRTÄ: - Äs Driiegg um z Viäregg.

ERSCHTÄ: - Vilicht chönntämär driidimensionalig Figurä infüägä?

ZWEITÄ: - Än Chegäl...

VIÄRTÄ: - Nei, das heds schon ämal gään.

ZWEITÄ: - Än Chegäl.

VIÄRTÄ: - Mä chönnti...*(vüsuächt in där Uufregig z'Wort zcho)* mä chönnti au än Skulptur machä.

DRITTÄ: - Oh, eini us Lätt odär eini us Bronze?

VIÄRTÄ: - Än Chuglä chönntämä machä.

DRITTÄ: - Än Chuglä...

ZWEITÄ: - Uf ärä Grundlag?

VIÄRTÄ: - Uf ärä Grundlag.

DRITTÄ: - Ufmä Sockäl?

VIÄRTÄ: - Anhand vu Berächnigä chönntämä schä...

DRITTÄ: - Berächnä anhand var Grundlag. Odär än Grundlag ohni Berächnig?

VIÄRTÄ: - Hmm...Wiä geid d Formlä var Grundlag vurä Chuglä?

ZWEITÄ: - I deichä, di Grundlag sötti... di Proportionä iinhaltä.

(Sichtbarä Durchbruch in derä vüfäarnä Situation.)

DRITTÄ: - Abär i han z Gfühl, das äs das schon ämal gään hed.

ZWEITÄ: - I au.

DRITTÄ: - Vilicht...schtimmt...

VIÄRTÄ: - Nei, miär chönntänd... miär chönntänd zum Bispil gar nüd tuän.

DRITTÄ: - Abär, das heds au schon gään.

ZWEITÄ: - Äso chönntämär äswas tuän und so tuän, äswä...

VIÄRTÄ: - Miär müäständ äswas tuän, will mä nümä nüd tuän cha.

ZWEITÄ: - Hmmh, das ischt scho so, abär...wemiär ünsch äswas abheglä tetänd?

DRITTÄ: - Nei, das heds schon gään.

ZWEITÄ: - Das heds schon gään, das gids schon, preziis.

DRITTÄ *(redät liisli und iindringli)*: - Und wemär äswas ab...ab...abhackä tetänd, ünsch vü...lezzä...

ZWEITÄ *(zeigt)*: - Äsoo?

DRITTÄ: - Ja, bis uf z Bluät.

ZWEITÄ: - Das ischt uusgezeichnet, abär das heds au schon gään.

VIÄRTÄ: - Miär chönntänd nisch umbringä, abär das heds au schon gään. Zum Glück...

DRITTÄ: - Abär wär seid denn, das äs das schon gäh hed, vārdammt. Heds das alläs schon gään?

VIÄRTÄ, ZWEITÄ: - Das heds schon gään, äs hed das schon gään.

DRITTÄ: - Denn, ja denn... denn schlach das nid vor, wenn's das schon gään hed.

ZWEITÄ: - Vilicht chönntämär äswas machä, dass...vilicht chönntämär... (*naa churzäm Zögärä*) Äch nei. Nei nei, das heds au schon gään.

DRITTÄ: - Was heds schon gään?

ZWEITÄ: - Ja asä, i han gädäicht miär chönntänd...än Handlig usfüärä, ohni ünsch inzbeziäh...

VIÄRTÄ (*undärbricht*): - Nei, das heds au schon gään.

ZWEITÄ: - ...usfüärä...

DRITTÄ (*vārschteids nid*): - Än Handlig usfüärä ohni ünsch inzbeziäh...Wiä denn?

ZWEITÄ: - Nei, das heds schon gään. Lömär das asä.

DRITTÄ: - Du, und wemär, du weischt schon, ehmm...ä Manät lang inärä Galerii wohnä tetänd?

ZWEITÄ: - Nei, au das heds schon gään.

VIÄRTÄ: - Das heds schon gään.

DRITTÄ: - Odär, wemär gaa würtänd? Irgänd äswannä hin.

Zeitä (*zögärnd*): - Gaan...

DRITTÄ (*bechräftigät*): - Gaan, z Fuäss...

VIÄRTÄ: - Z Fuäss. Am Schtrand. Dm Meer nahi. Das heds schon gään. I han drübär än Dokumentäzion gsee...

ZWEITÄ: - Abär heds das ganz sichär schon gään? Heds das schon ämal gään. (*Wendätschi an dän Erscht*) Hess du gsee?

ERSCHTÄ (*ischt nid orientiärt, will är grad an äswas anderschs gädäicht hed, abär är gid Antwort mid Übärzüügig*): - Das heds schon gään, das han i gsee.

VIÄRTÄ: - I hans au gsee, diä...

DRITTÄ: - Und wiä weers mit Gaan ohni Dokumentäzion?

ZWEITÄ: - Ohni Dokumentäzion? (*Glächtär*)

VIÄRTÄ: - Ohni Dokumentäzion zum Kurator gaan. (*Glächtär*)

ERSCHTÄ (*naiv*): - Das heds no niä gään.

VIÄRTÄ: - Das heds schon gään, das heds gään, das ischt ja ganz alltägli.

ZWEITÄ: - Miär chönntänd än ärfundni Situäzion vāranschtaltä, eini was nid gid...

VIÄRTÄ: - Miär chönntänd än Pärson ärfindä. Abär das heds au schon gään.

ZWEITÄ: - Das heds schon gään. Sogar schon än paar Mal.

VIÄRTÄ: - Preziis.

(*Schi hockänd eng um dä viäreggig Tisch zämä und rauchänd. Nu där Dritt nid, will är Nichtrauchär ischt.*)

ZWEITÄ (*übärzüügt*): - Und wemär äswas...

VIÄRTÄ (*ärmuätigänd*): - Ja?

ZWEITÄ: - Undär Iifluss va Drogä machä tetänd?

VIÄRTÄ (*proteschtiärt, äntüüschet vam Vorschlag vam Zweitä*): - Nei nei, das heds schon gään, das heds schon gään.

ZWEITÄ (*z'Reschthli Uufmerksamkeit, wa är no hed uusnutzänd*): - Noch äswas...

DRITTÄ: - Asä, loss zuä. Wiä wers, wemär... Teili vamä menschlichä Körper näh würtänd und...

ZWEITÄ (*gid z'vārschtaa, das är weis, um wasäs däm Drittä geid*): - und in där Gägänd umärwärfä.

DRITTÄ: - Umärwärfä odär uufheichä. Du weischt scho, schä benutzä.

ERSCHTÄ: - Und wemär äswas mit Brunz...

ZWEITÄ: - Chunscht us Brunz

VIÄRTÄ: - Das heds au schon gään.

DRITTÄ: - Miär chönntänd irgänd äswäm äswas iinpflanzä odär vārpflanzä?

ZWEITÄ: - Das ischt sehr guät, abär... das heds schon gään. Das heds schon gään.

DRITTÄ (*gid nid uuf*): - Abär, du weischt schon, da heds diä Opärätionä gään, abär...

VIÄRTÄ: - Das heds schon gään. Das heds alls schon gään. (*Redät nümä wiitär, vārsüicht in Gedankä.*)

DRITTÄ: - Abär äswas iinpflanzä...

ZWEITÄ: - Iinpflanzä? Abär was denn?

DRITTÄ: - Was weiss ii. Än Sendär, än Ämpfängär odär... än Färnstüürig.

ZWEITÄ (*mid übärzüügig*): - Das heds schon gään.

VIÄRTÄ: - Ganz beschtimmt.

ERSCHTÄ: - Das heds schon gään. Ämä Kärli händschi d Schtundä ingäblendät wennärschi umgluägät hed.

DRITTÄ: - Welli Schtundä?

VIÄRTÄ: - Welli Schtundä? Schini letschtä?

DRITTÄ: - Und wärum nid. Wärum nid äswas ...zum Biischpiil äswas tötä?

VIÄRTÄ: - Nei, wo deichhscht au hin?

ZWEITÄ: - Miär chönntnd schon tötä, abär...

DRITTÄ: - Abschlachtä...
ZWEITÄ: - Das heds schon gään.
DRITTÄ: - Abschlachtä?
ERSCHTÄ (*mid truurigär Schtimm*):- Abschlachtä. Au das heds schon gään.
VIÄRTÄ: - Oh, das heds schon gään.
DRITTÄ (*reflexartig*): - Ja, das heds schon gään.

ZWEITÄ: - Vilicht ämal ganz andärscht. Sä viil as mügli andärscht...
VIÄRTÄ (*undärbricht*): -Wiä wers, wemär nu äswas sägä tetänd? Nu äswäm äswas sägä. Nüüd tuän, nu äswas sägä.
DRITTÄ: - Äswas värzälä.
VIÄRTÄ: - Odär uufschribä?
ZWEITÄ: - I deichä da an äswas Ehnlichs. Äswas värkaufä, vor das mäs gmacht hed. Unds de gar nümme machä.
DRITTÄ: - Das heds schon gään.
ZWEITÄ: - Das heds schon gään? (*Na churzäm Schwiigä*) Und chönntmärs nid namal värkaufä?
DRITTÄ: - Das heds au schon gään.
ZWEITÄ: - Das heds au schon gään? Zwei Mal?

VIÄRTÄ: - Miär chönntänd in ä Galerie gan und sägä, das äs ünsch donndärli gfallt.
DRITTÄ: - Das hani äswo gsee.
ZWEITÄ: - Das heds schon gään, das heds schon gään.
DRITTÄ: - I hans au gsee. Du, miär chönntänd doch eifach än Fotti machä odär äso...
ZWEITÄ: - Das heds schon gään.
VIÄRTÄ: - Das heds schon gään, abär än Fotti va was genau?
DRITTÄ: - Ja asä, zum Biispiil ää...än Fotti va nüüd.
ZWEITÄ: - Ooh...
DRITTÄ (*fahrt fort*): - Ohni Fottiappärat.
ZWEITÄ: - Heds das schon gään?
ERSCHTÄ: - Das heds schon gään.
VIÄRTÄ: - Wiä wers, wemär nu z Fottipäpiir entwicklä tetänd?
DRITTÄ: - Das heds au schon gään.
VIÄRTÄ: - Odär än Fotti in där Düüchli machä. In völliigär Düüchli.
DRITTÄ: - Das heds au schon gään.
ERSCHTÄ: - Sogar föttälä im Traum heds schon gään.
VIÄRTÄ: - Miär chönntänd äswas us Zuäfall ...machä.
DRITTÄ: - Was heisst das? Wiä denn?
VIÄRTÄ: - Us Värsehä.
ZWEITÄ: - Ischt schon gmachät chon.
VIÄRTÄ: - Und äswas us Ohräschmalz?
ZWEITÄ: - Au.
DRITTÄ: - Jaa...
ZWEITÄ: - Us alläm gids schon äswas. Das füärt zu nüd.
DRITTÄ: - Und us kosmischär Schtraalig?
ZWEITÄ: - Heds schon gään, das heds schon gään.
VIÄRTÄ: - Us Schtaub heds au schon äswas gään.
ZWEITÄ: - Übärhopt, miär chönntänd än Kontakt härstellä und döttä (*züücht d'Schultärä höch und luägät in dä Himmäl*) dussnä suächä.
DRITTÄ: - Was? Ussäirdischi?
VIÄRTÄ: - Odär... äswas mid ärä Wahrsägäri?
ZWEITÄ: - Ättäs dötthärä schickä. (*Zeigt widär mid dm Fingär*) Zum Biispiil...
DRITTÄ (*undärbricht*): - Us dä Stärnä wahrsägä...
VIÄRTÄ: - Ämä Priäschtar.
ZWEITÄ (*lächlet*): -Im All.
DRITTÄ: - Das heds schon gään.
ZWEITÄ: - Mid ämä Priäschtä heds schon äswas gään.
VIÄRTÄ: - Was heds mid ämä Priäschtr schon gään?

DRITTÄ: - Wiä wärs, wemär än ungfrauti Situäzion abhaltä tetänd?
VIÄRTÄ: - D Öffäntlichkeät ärschreckä.
ZWEITÄ: - Äntsetzli ärschreckä?
VIÄRTÄ: - Das hani schon ämal gsee.
DRITTÄ: - Vilicht chönntämär äswas Gruusigs zeigä?
VIÄRTÄ: - Ja, au das hani schon ämal gsee. Ja.
(*Blühändi Bömm, Rasä, Tulpä. Minitisch. Und äs ischt chalt, abär grad no zum uushaltä.*)

DRITTÄ: - Und wemär... mid ämä Flugzüüg fläügä tetänd?

(Drii Sekundä lang deichäntsch an z flüügä)

VIÄRTÄ *(zündätschi än Zigärettä an, lüpf d' Schultärä)*: - Vilicht heds das no nid gään...

ERSCHTÄ: - Das heds schon gään.

DRITTÄ: - Und wemär äswannä abgumpä tetänd?

VIÄRTÄ: - Ja, varä Garaasch.

DRITTÄ: - Nei, varä Brugg.

VIÄRTÄ: - Varä Brugg? Nei, gwüss nid, i han schon äswas ganz ähnlichs gsee.

ZWEITÄ: - Miär chönntänd au no äswas machä unds gar nid zerscht... unds värsteckä.

VIÄRTÄ: - Värgrabä?

DRITTÄ: - Das heds au schon gään.

ZWEITÄ: - Heds das schon gään?

DRITTÄ: - Odär tauchä, du weischt schon, undär Wassär.

ERSCHTÄ: - Das heds schon gään.

DRITTÄ: - Heds das schon gään?

ERSCHTÄ: - Ja, da sind värschidäni Sachä passiärt.

DRITTÄ: - Asä, was heds den no nid gään?

ZWEITÄ: - Nu, miär chönntänd z Muul haltä.

VIÄRTÄ: - Und nisch iischperä, müglichrwiisch?

ZWEITÄ: - Ünsch iischperä.

VIÄRTÄ: - Miär chönntänd nisch iischperä.

DRITTÄ: - Das heds schon ämal gään.

ZWEITÄ: - Das heds schon gään?

DRITTÄ: - Das heds schon gään. *(Naamä Wiili)* Wiä wärs mid Hockä?

VIÄRTÄ: - Das heds schon gään. Ja, das hani gsee.

ZWEITÄ: - Odär äso än Gschtank machä und schi drin iischperä...

VIÄRTÄ: - Nei, das... *(schi chönndtschi nümmä zrugghebä und föönd a lachä.)*

DRITTÄ: - Und wenn..., wemär ünsch im Gfengniss iischperä lesänd?

VIÄRTÄ: - Nei, das heds schon gään, i han ghört, das einä preziis das gmachät hed.

ZWEITÄ: - Odär miär chönntänd nisch imä duuchlä, chleinä Ätäs iischperä.

DRITTÄ *(schtudiärt)*: - Imä duuchlä, chleinä Ätäs. In irgänd ä Schachtflä...

VIÄRTÄ: - Miär chönntänd... *(Gid däm Drittä Antwort)* Nei, das heds schon gään.

DRITTÄ: - Das heds schon gään, ja.

VIÄRTÄ: - Imä Graab. Das hani gsee, das heds au schon gään.

ZWEITÄ: - Ja, heds das au schon gään?

DRITTÄ: - Und wemär zum Biischpiil irgänd äswas Gägäschend schrumpfä tetänd?

(luägät där Erscht an, abär där gid kein Antwort.)

VIÄRTÄ: - Odär värgrössärä. Abär au das heds schon gään. Hans gsee.

ZWEITÄ: - Miär chönntänd ganz uf di Galerii värzichtä...

VIÄRTÄ: - ääh... das heds schon gään, das weischt du doch, odär...

DRITTÄ: - Odär vilicht im Kino äswas machä?

ZWEITÄ *(übrleid äs Wiili)*: - Das heds schon gään.

VIÄRTÄ: - Äs ischt glich, wo. Alls heds schon ämal gään. Siis im Zirkus odr uf där Schtras. Äs hed alls schon ämal gään.

DRITTÄ *(gid schi gschlagä)*: - Uf där Schtras, das heds au schon gään, ja.

ZWEITÄ: - Das heds schon gään.

ERSCHTÄ: - Di Zuäschauär abzühä.

VIÄRTÄ: - Ääh, das hanni gsee.

DRITTÄ: - Ja, i au.

VIÄRTÄ: - Und wenn... und wemär irgänd äswas Abgüss machä tetänd, us irgänd ättäs?

ZWEITÄ *(hantiärt bildlich)*: - I würti äso än Abguss machä, dass... wenn du nä zum Biispiil var einä Siitä aluägscht, gseescht... äswas, und var andärä Siitä äswas ganz andärschts.

VIÄRTÄ, ERSCHTÄ *(glichrzichtig)*: - Das gids schon.

VIÄRTÄ: - Odär meeh äswas Sozials...

ZWEITÄ: - Schi sälbär dürrlöchärä, zum Biispiil.

DRITTÄ: - Schi wass?

ZWEITÄ *(lüütär)*: - Dürrborrä.

DRITTÄ *(värschtaids nid)*: - Dürr was düüra?

ZWEITÄ: - Dürr schi sälbär. Schi sälbär dürrschtächä.

DRITTÄ: - Düür und düür?

VIÄRTÄ: - Pirrsing? Das gids schon.

DRITTÄ: - Das gids schon.

ZWEITÄ (*schtreckt schi und tuät d Armä uusbreitä*): - Vilicht chönntämär in där Natur äswas machä, äswas zärbrächä...

ERSCHTÄ: - Än Igriff...

ZWEITÄ: - Än Igriff, abär so...

DRITTÄ: - Än Igriff...

ZWEITÄ: - Dän Igriff heds schon gään.

DRITTÄ: - Än Iimischig.

ZWEITÄ: - Än Iimischig heds schon gään.

ERSCHTÄ: - Mä chönnti us Pärisar Skulpturä machä, zum Biispiil. (*N a mä Wiili*) Das heds au schon gään.

ZWEITÄ: - Das heds no nid gään.

ERSCHTÄ: - Scho heds das gään.

ZWEITÄ: - Heds das schon gään? Ähä.

DRITTÄ: - Und wemär us Schtahl äswas machä tetänd...

VIÄRTÄ (*undrbricht*): - Us roschtfrüäm Schtahl. Abär was? Das heds doch schon gään. Us dischäm odär jenäm Schtahl. Abär was?

DRITTÄ: - Äch... irgänd äswas Modell. Va Rüüm...

VIÄRTÄ: - Naabildigä? Naabildigä heds schon gään.

DRITTÄ: - Abär biispilswiis Naabildigä im Värheltniss eis zu eis...

VIÄRTÄ (*na churzäm übärleggä*): - Das heds au schon gään.

VIÄRTÄ, DRITTÄ: - Das heds schon gään.

DRITTÄ: - Und wemär...

ZWEITÄ (*hantiärt*): - Än Ruum machä tetänd, äs Modell...

DRITTÄ: - Du luägscht iin...

ZWEITÄ: - Äntwädär du luägscht iin odär du gaischt iin. Und äswas bewegtschi.

VIÄRTÄ: - Hani gsee. Wo i iinbi, hedschi nüüd bewegt.

ZWEITÄ: - Äs hedschi nüüd bewegt? (*schi lachänd*) Abr iss aagmalät gsi?

VIÄRTÄ: - Ja, säb iss gsi. Und wemär di Ziit ahaltä tetänd?

ZWEITÄ: - Das heds schon gään.

DRITTÄ: - Wiä: Das heds schon gään. Heds das gään?

VIÄRTÄ: - Das heds schon gään.

ZWEITÄ: - Und wiä weers mid ämä geziiltä Schifüägä als Bewiis va Awäsähait?

DRITTÄ: - Au das heds schon gään. Vilicht äswas übär Vögäli?

VIÄRTÄ: - Äswas übär Bömm?

ERSCHTÄ: - Übär z'Värgaah...

DRITTÄ: - Übär d'Lengwiili.

VIÄRTÄ: - Übär Lengwiili heds äswas gään.

DRITTÄ: - Und wemär äswas namal machä tetänd?

ZWEITÄ: - Namal, das heds schon gään.

VIÄRTÄ: - Namal, hmm... Das heds schon gään.

DRITTÄ: - Ja denn, noch eimal.

VIÄRTÄ: - Das heds au gään. Und noch eimal, heds das au gään?

ZWEITÄ: - Ja, bis zum viärzehäntämal heds das schon gään... (*Glächtär*)

ZWEITÄ: - Und au wenn's das no nid gid, äs ischt, als obs das schon gään hätti.

ZWEITÄ: - Und wemär ä Gruäbä graba tetänd?

DRITTÄ: - Än Gruäbä... Wo zum Biispiil?

ZWEITÄ: - I han gsinnät, im Uusland.

VIÄRTÄ: - Abär das heds schon gään. Vilicht äswas Urbanistischäs?

DRITTÄ: - Architektonischäs...

ERSCHTÄ: - Das heds schon gään.

ZWEITÄ: - Miär chönntänd Liinäseck aleggä...

VIÄRTÄ: - Derä Grauä?

ERSCHTÄ: - Nei, das heds schon gään. Das hemär doch gseid.

VIÄRTÄ: - Äswas übär Auto?

ZWEITÄ: - Das heds schon gään.

VIÄRTÄ: - Übär d'Schtruktur var Materiä?

DRITTÄ: - Übär d'Schtruktur heds schon äswas gään. Übär Püggäli?

VIÄRTÄ: - Übär Püggäli hani äswas ghöört. Übär Seefehlär, übär Gäbräschtä allgemain, au übär Tugänd. Das heds schon gään.

DRITTÄ: - Übär Bekannti?

VIÄRTÄ: - Übär berüämti Lüüt?

DRITTÄ: - Übär berüämti Lüüt chamä au äswas machä. Und übär Bekannti?

VIÄRTÄ: - I weiss nid.

ZWEITÄ: - Das heds schon gään, das heds schon gään. I han Fotänä gsee.

ERSCHTÄ: - Schtändig würt äswär berüämt.

ZWEITÄ: - Und wemär äswas machänd unds denn värebbrennänd?

ERSCHTÄ: - Das heds au schon gään.

ZWEITÄ: - Und wemär dän Wärt vam Wärch naa där Patinä var Bronze richtä tetänd.
(*Än Sekundä Schtilli, denn Glächtär*)

ZWEITÄ: - Wiä weers wemär ganz eifach zur Zeichnig zruggecherä tetänd?

VIÄRTÄ: - Zur Zeichnig und solidä Grundsätz.

ZWEITÄ: - Abär das Zruggecherä heds schon ämal gään.

DRITTÄ: - Das heds doch schon gään.

VIÄRTÄ: - Vilicht äs was mid Technologii?

ZWEITÄ: - Das heds au schon gään, das heds schon gään.

DRITTÄ: - Das heds schon gään.

ZWEITÄ: - Än Vogäl uusschtopfä, abär das heds au schon gään.

VIÄRTÄ: - Vilicht äs was zum Schmeckä?

ZWEITÄ: - Nu für dä Gruchsinn?

VIÄRTÄ: - Ja.

ZWEITÄ: - Das heds schon gään.

ERSCHTÄ: - Das heds schon gään.

DRITTÄ: - Und wemär äs was värtrülä tetänd? Nu äs bitschi, du weischt schon...

ZWEITÄ: - Äs chleis chleis bitschi

DRITTÄ: - Vilicht mee as...

ZWEITÄ: - Mee as äs bitschi? Das heds schon gään.



AKT II

As Bühnabild äs leers Ambfiteatär. Ds Wätär ischt hübsch, ä biz luftig abär sunig. Im Hindärgrund gseed mä guät di gradä Liniä va dä Holzbenk, wo übär dän Graashügl ufschtigänd und di Tribühnä vam Ambfiteatär bildänd. Mä ghört Vögäl zwitschärä und Hundä bällä. Där Erscht, där Zweit, där Dritt und där Viärt sind ins Gschpreech vartüüft.

VIÄRTÄ: - Odär söväl ässä, das

ERSCHTÄ: - Das mär chozzänd.

DRITTÄ: - Heds das nid schon gään?

ZWEITÄ: - Das heds schon gään. Und wemär...wemär dän Wärt vam Wärch sälbär vorschübä tetänd? Nä übärhopt uufheba und... nisch mee mid där Pärson vam Chünschtlär befassä tetänd...

(*alli sind, au wensch nid ganz därvaä übrzüügt sind, iivärschtändä, das äs das schon gään hed. Schi nikänd mid dä Chöpf.*)

ZWEITÄ (*gid nid uuf*): - Schi elegant aaleggä, in Brokat..

DRITTÄ (*winkt ab*): - Das heds schon gään.

ZWEITÄ (*redät vorwärts*): - Mid Limusinä umärfahrä, hübschi Frauä...

DRITTÄ (*nid ganz sich*): - Ja?

VIÄRTÄ: - Neinei. Das heds schon gään, das chennt mä.

ZWEITÄ: - Populer siin...

ALLI: - Jaja, das heds schon gään.

DRITTÄ: - Und wemär eifach Graas seeä tetänd?

ZWEITÄ: - Seeä?

DRITTÄ: - Preziis. Graas seeä und...

ZWEITÄ: - Bömm au?

VIÄRTÄ: - Das heds schon gään.

DRITTÄ (*gids zuä*): - Das heds schon gään.

VIÄRTÄ: - Miär chönntänd z'Graas rauchä?

ZWEITÄ (*nimmt diä Idee uuf*): - Miär chönntänds rauchä, ja.

BEEDI: - Das heds schon gään, das heds schon gään.

ZWEITÄ: - In däm Fall chönntämär vilicht...vilicht chönntämär eifach Zeichä machä, dass schi rund um dä Chünschtlär ä zuäni Zonä bildät...

DRITTÄ: - Und wa machscht du diä Zeichä?

ZWEITÄ: - Im Värschtecktä. Du brichscht z'lisch uf dä Gumpä...

DRITTÄ: - Ähä.

VIÄRTÄ: - Abär niämät gseeds?
 ZWEITÄ: - Niämät gseeds. Äs ischt ä Privatsach.
 DRITTÄ: - Das heds schon gään. Dasäs niämät gseed, das heds schon gään.
 DRITTÄ: - Vilicht äs was us Luft? (*luägät umär*) Äs luftät, losäd, äs was us Luft!
 ZWEITÄ (*grift diä Idee uf*): - Us Luft?
 VIÄRTÄ: - Was?
 DRITTÄ: - Där Luft benutzä, zum Biispiil...
 ZWEITÄ: - Nei, us Luft, us Ärdä...das heds alls schon gään.
 DRITTÄ: - Wiä gseeds mid däm Meer uus?
 ZWEITÄ: - Us Meer au. Das muäss äs gään han.
 DRITTÄ: - Us Wassär?
 ZWEITÄ: - Us Iisch?
 VIÄRTÄ: - Oh, (*zeigät mid däm Fingär uf äs was vor schi*) vilicht äs was übär Fläügä?
 DRITTÄ: - Übr Fläügä heds schon äs was gään.
 ERSCHTÄ (*übärzüügt*): - Das heds schon gään.
 ZWEITÄ: - und wemär äs was mid Värschwiztnä machä tetänd?
 DRITTÄ: - Mid Müädnä?
 ZWEITÄ: - Nei, mid Dicknä, Värshiztnä...
 DRITTÄ: - Äch, das heds au schon gään.
 VIÄRTÄ: - Heds schon gään? Blutti heds au gään?
 DRITTÄ: - Mid Bluttnä heds au schon äs was gään?
 ZWEITÄ: - Mid Bluttnä? Heds gään.
 DRITTÄ: - Äch dass, ja, das heds schon gään.
 VIÄRTÄ: - Heds äs was übär Perversi gään?
 ZWEITÄ (*churz, ohni Intressä*): - Das heds schon gään.
 DRITTÄ: - Und mid äs was Bluttnä, mit Chappänä?
 ZWEITÄ: - Mid Chappänä?
 DRITTÄ: - Mid Chappänä.
 VIÄRTÄ: - Das chund uf d'Chappänä an. (*Glächtr*)
 ZWEITÄ: - Mid Bärgarbeitärchappänä?
 DRITTÄ: - Zum Biispiil...
 VIÄRTÄ: - Odär vilicht...
 DRITTÄ: - Was?
 VIÄRTÄ: - Äs was übär äs Welo vilicht?
 ZWEITÄ (*reez*): - Nei. Übär äs Welo heds schon äs was gään.
 DRITTÄ: - Heds das gään?
 ZWEITÄ: - Das heds gään, das heds alls schon gään. Übär än Flügäl, übär äs Welo...
 DRITTÄ: - Äch, das hani gsee, einä ischt mid däm Welo umärgfährä, ja tatsächli: Är ischt di ganz Ziit uf där glichä Schtell gfährä.

VIÄRTÄ: - Und wemär äs was ganz ehrli machä tetänd?
 DRITTÄ: - Idealistisch...
 VIÄRTÄ: - Idealistisch, ja...
 ERSCHTÄ: - Das heds schon gään.
 VIÄRTÄ: - Äs was nu für d'Sach sälbär tuän!
 ZWEITÄ: - Wenns das schon gään hed, denn chönntämär vilicht äs was...machä wo...
 DRITTÄ (*ghid mä ins Wort*): - Unehrli ischt.
 ZWEITÄ: - Ja, nu wägäm Gäld.
 DRITTÄ: - So richtig unehrli, ironisch.
 ZWEITÄ: - Unehrli heds schon gään, ganz ehrli, das heds schon gään.

VIÄRTÄ: - Und wemär än Paleschthinensär und än Juud iladä tetänd?
 ZWEITÄ: - Das heds schon ämal gään.
 DRITTÄ: - Und än Afgan.
 ZWEITÄ: - Än Afgan, das heds au schon gään.
 ZWEITÄ: - Vilicht chönntämär Schteinä ushöölä...
 DRITTÄ: - Ushöölä? Ganz?
 VIÄRTÄ: - Heds das schon gään?
 DRITTÄ: - Heds z'Ushöölä gäh?
 VIÄRTÄ (*ärinnärät schi*): - Ds Ushöölä heds schon gään.
 DRITTÄ: - Und wemär anschtatt Schteinä ushöölä,...
 VIÄRTÄ: - Miär chönntänd Schteinä tröölä...
 ZWEITÄ: - Äch, mid Schteinä, da gids schon viil, ja. Mid Wassär und mid Schteinä...
 VIÄRTÄ: - Hmm. (*Na mä lengärä Wiili*) Heds äs was mid Schmalz gään?
 DRITTÄ: - Mid Schmalz?

ERSCHTÄ: - Mid Schwiischmalz heds äs was gään.

DRITTÄ: - Mid Unschlätt.

VIÄRTÄ: - Mid Margäriinä.

DRITTÄ: - Neei, das sind Läbänsmittäl...

VIÄRTÄ: - Salz isetzä...

ZWEITÄ: - Salz, das heds gään, das heds schon gään. Salz, Zuckär, Määl, äh, Habärmuäs...

VIÄRTÄ: - Habärmuäs heds au gään?

DRITTÄ: - Gaffi.

ZWEITÄ: - Äs hed gään, Habärmuäs, Gaffi, Tee...

ZWEITÄ: - Zitronä, Määl, Teigwarä...

DRITTÄ: - Härdöpfäl...

ZWEITÄ: - Übärhopt, mid Läbänsmittäl, das heds alls schon gään.

DRITTÄ: - Heds äs was mid Gagoo gään?

VIÄRTÄ: - Gagoo, das muäss äs gään han.

ERSCHTÄ: - Us Meel chönntämä viil Sachä machä.

DRITTÄ: - Vilicht äs was bachä?

VIÄRTÄ: - Nei, das heds schon gään, das heds schon gään.

ZWEITÄ: - Odärs äso machä, dasd (*schtreckt d'Hend us*) täheimät bischt und ...so än Film...wad tanzischt.

ERSCHTÄ (*mags*): - Ja!

DRITTÄ (*lächlet mitleidig*): - Das heds schon gään.

ZWEITÄ: - Vilicht chönntämär... Lööd nisch ä Moment zur Fotigrafii zruggchon. Fottänä machä mid altnä Lüüt druf. Hend.

Grossufnahmä...(*Macht na jedäm Satz Pausä, um där richtig Lindruck zärweckä*).

DRITTÄ: - Das heds schon gään.

VIÄRTÄ: - Das hani gsee.

(*Dr Erscht luäget d'Hend vam Zweitä an und nickt wiä di andärä au*)

DRITTÄ: - Alti, Jungi

VIÄRTÄ: - Hend, Bein...

(*Schi lachänd*)

ERSCHTÄ: - Das heds alls schon gään.

DRITTÄ: - Und wiä wers denn, wemär irgänd äs was... du weischt schon...Poppänä uf die Bühni schtellä tetänd und ...

ZWEITÄ (*büügt schi zum Drittä*): - Poppänä?

DRITTÄ: - Poppä, söttigi us Plaschtig, du weischt schon...

ZWEITÄ: - Söttig äsiä Zärbrochni, mid ämä schpässigän Aug, kuriosi Poppä?

VIÄRTÄ: - I weiss, das hani schon gsee.

ZWEITÄ: - Diä heds beschtimmt gään, i hanärä au schon gsee.

DRITTÄ (*würft in*): - Schi sind schwarz angleid gsin.

ZWEITÄ: - Ja, und Wägäli, söttig mid Deigslä händsch.

VIÄRTÄ: - Äso alti, käputti, ja gwüss.

ZWEITÄ: - Alti. Ja, äs Rad fehlt zum Biispiil.

DRITTÄ: - Mid Wagä, das heds schon gään, ja.

ERSCHTÄ: - Und mid däm Ichaufswägäli im Ladä, heds da äs was gään?

ZWEITÄ: - Heds gään.

DRITTÄ: - Heds schon gään.

VIÄRTÄ: - Das heds schon gään.

(*Äs Wiili schwiigändsch.*)

ZWEITÄ: - Übärhopt, mid Lädä iss vərbii. Und mid andärä Lädä?

VIÄRTÄ: - Au.

DRITTÄ: - Und im Schpital, heds da schon äs was gään?

ZWEITÄ: - Oho! (*mä weiss abr nid obs mä das gfallä hed odr nid.*)

VIÄRTÄ: - Im Schpital, da heds schon äs was gään.

DRITTÄ: - Das äswär chrank ischt und äso...

ZWEITÄ: - Und wiä wers denn, wemär, du weischt schon...

VIÄRTÄ: - Ja?

ZWEITÄ: - Nümärli malä tetänd. Odär Schtrichli uff...

VIÄRTÄ: - Zellä?

ZWEITÄ: - Äs was zellä, gwüss.

VIÄRTÄ: - Das heds schon gään.

ERSCHTÄ: - Und wemär van ünsch än Fotti machä tetänd?

VIÄRTÄ: - Irä Gumpä vilicht? Und äs was in där Gumpä dinä?

DRITTÄ: - Inä Gumpä staan.

ERSCHTÄ (*as ob är nid hört hätti, was di andärä sägänd*): - Miär chönntänd jedä Tag äm Eis ä Fotti va ünsch machä.

VIÄRTÄ: - Das heds schon gään.
 DRITTÄ: - Das heds schon gään, ja. Alltag, das heds schon gään.
 ZWEITÄ: - Das heds schon gään. Alltag und Fotti und übärhopt, Alltag, das heds schon gään.
 VIÄRTÄ: - Und übär än Gumpä, heds da äswas gään?
 DRITTÄ: - Übär än Gumpä?
 VIÄRTÄ: - Ja.
 ERSCHTÄ (*uufgreget, will är ufzmal än Idee hed*): - Das heds gään.
 VIÄRTÄ: - Miär chönntänd än Wettbewärb vāranschtaltä – wenn äswär van äswas ghört hed, waas no nid gid, söll ärs sägä.
 ZWEITÄ: - Wettbewärb heds schon gään.
 DRITTÄ: - Wiä chan är va äswas ghört han, waas no nid gid?
 ZWEITÄ: - Richtig. Abär Wettbewärb heds schon gään (*äntschidä*).
 VIÄRTÄ: - Wettbewärb heds schon gään. Ja, denn hald kein Wettbewärb. Denn machämär än...
 DRITTÄ: - Vārschteigärig
 VIÄRTÄ: - Än Bitt um...
 DRITTÄ: - Nei, löd nisch än Vārschteigärig machä.
 ZWEITÄ: - Vārschteigärigä heds schon gän.
 VIÄRTÄ: - Vārschteigärigä gids, heds gään und wurts immär gään.
 VIÄRTÄ: - Miär chönntänd nisch as äswär andrscht vārchleidä?
 DRITTÄ (*halbluut*): - Das heds schon gään.
 VIÄRTÄ: - Ja, abr as Jedä?
 (*Där Zweit und där Dritt vārsuächänd, schi gägäsiitig übärtönänd, Schtellig znää zum Vorschlag vam Viertä, där Erscht luägät dārwiil in d'Wiiti, au är seid äswas, abär mä ghört nä nid.*)
 ZWEITÄ: - Äch nei, äs glengt, schi zvārchleidä, so...
 DRITTÄ: - Abär schliässli bruchänd miär nisch nid as Jedä zvārchleidä.
 ZWEITÄ: - ...dasd nid ehnlī uusgsiäsch...
 DRITTÄ: - Miär chönntänd nisch biispiilswiis as ünsch sälbär vārchleidä. Gägäsiitig.
 ZWEITÄ: - Chönntämär, abär das heds schon gään. Das heds schon gään. Schi zvārchleidä heds schon gään.
 VIÄRTÄ: - As schi sälbär zvārchleidä heds schon gään.
 DRITTÄ: - und wemär Battäriä ärschöpfä tetänd?
 (*där Zweit lachät*)
 VIÄRTÄ: - Das heds schon gään. Das hani gsee.
 ZWEITÄ: - Diä Art van Aktion... das chenni.
 DRITTÄ (*glaubts immär no nid*): - Was?
 VIÄRTÄ: - Chünschtlärischäs Vārbruchä van Energii odär?
 DRITTÄ: - Nei. Ds Chunschtwārch wer eifach ds Ärschöpfä va Battäriä.
 VIÄRTÄ: - Äch ja, das cheni.
 ZWEITÄ: - Jaja. Vilicht nid gwönlähi Battäriä, nemmli...
 VIÄRTÄ: - Autobattäriä.
 ZWEITÄ: - ...di säb Art vu Akzionä, wa...
 VIÄRTÄ: - va Traktorä.
 DRITTÄ: - Hmm. Ja?
 VIÄRTÄ: - Ja.



AKT III

Irä leerä, wiis gschtrichnä Galerii redänd d'Chünschtlär wiitär.

VIÄRTÄ: - Und vilicht äswas in där Luft?
 DRITTÄ: - In där Luft? Im Grossä und Ganzä heds Sachä gään in där Luft, abär weischt...
 (*ärwartät vam Viertä än prezisäri Antwort*)
 VIÄRTÄ: - Än Skulptur us Rauch...
 DRITTÄ: - Ähä, das heds schon gään.
 ZWEITÄ (*dreht schi um*): - Und wemär äswas iinmuurä tetänd?
 DRITTÄ: - Das heds schon gään. Vilicht äswas iingfrüürä?

VIÄRTÄ: - Diä Wand iingfrüürä (*schtrichlät d'Wand, wo är schan blibän ischt*).

DRITTÄ: - Zum Biispiil.

ZWEITÄ: - Ingfrüürä, das heds schon gään. (*Namä Wiili*) Miär chönntänd än Inschtituzion da härä, in di Galerii züglä.

DRITTÄ: - Alls zämä?

ZWEITÄ (*macht witär*): - än öffäntlihi...

DRITTÄ: - Das heds schon gään.

ZWEITÄ (*gid schi nid gschlagä*): - Där Ruum väreändärä...

VIÄRTÄ (*würft därzwüschät*): - Odär än Baar...

DRITTÄ: - Än Baar, das heds schon gään.

(*Ohni äswas zsägä, föndsch an, di Trennwand zwüschät dä bedä Riium var Galerie zumchreisä.*)

DRITTÄ: - Loss zuä. Miär chönntänd doch, miär chönntänd da äswas äso risigs inärschtellä, dasäs nid inärpasst...du weischt schon...

VIÄRTÄ: - Das heds schon gään. Nei, das heds schon gään.

ZWEITÄ (*bükt schi mid uusgschtrecktnä Armä vüri*): - Wiä wers denn, wemär va ättäs ganz viil uufschtellä tetänd?

DRITTÄ (*rüeft usm Ruum därnabät*): - Abär das heds schon gään.

ZWEITÄ: - Heds viil gään?

DRITTÄ: - Viil heds gään, ja.

ZWEITÄ: - Miär chönntänd au äs Video dreeä und mid irgänd äswas Efekt äso färba, das äso...

DRITTÄ (*ghii dm Zweitä ins Wort*): - Värechidäni irgänd äswas Efekt?

DRITTÄ (*gheimnisvoll*): - Ja. Schtroboskop, äswas bewegt schi...

VIÄRTÄ: - So zämägsezt?

DRITTÄ: - Hani gsee.

ZWEITÄ: - Hesch?

DRITTÄ: - Ja. Da hetschi äswas gädreht und schi äntsezzli krümmt...

VIÄRTÄ: - Und denn hedsschi in diä... in Driiegg värewandlät.

ZWEITÄ (*mit düütlichär Bewundärig*): - Va Ziit zu Ziit züücht än Schriftzug värbi...

DRITTÄ: - Ja...

VIÄRTÄ: - Und Viäreagg...

ZWEITÄ: - Buächstabä...

DRITTÄ: - Derä Sachä heds gään. Ja.

VIÄRTÄ: - Va obnä, va dunä...

DRITTÄ (*lächärig*): - Jaaa.

(*Schi laufänd in där Galerii umär und schtudiäränd fescht*)

ERSCHTÄ: - Mä chönnti d'Chantä in där Galerii abrundä.

DRITTÄ: - Asä nei, sichär nid.

ZWEITÄ: - Nei, das heds schon gään.

VIÄRTÄ: - Abär äswas müässtämär machä.

(*Schi värteiländ schi im Ruum und chommänd naamä Wiili zrug.*)

ZWEITÄ: - Miär chönntänd z'Gäld var Galerii nää und fortfahrä...

VIÄRTÄ: - Naa Häweii.

ZWEITÄ: - In d'Ferä.

VIÄRTÄ: - Das heds schon gään. I han grad därvaä gläsä.

DRITTÄ: - Das heds gään. (*Na lengäräm schtudiärä*) Vilicht...nottä nid fortfahrä.

ZWEITÄ: - Vilicht nid ässä?

(*Där Viert gagärät*)

DRITTÄ: - Du meinscht hungärä? I glaubä, das heds schon gään.

VIÄRTÄ: - Wiä wäars mid äswas hübschäm?

ZWEITÄ (*sehnsüchtig*): - Äswas Hübschäm. Äsoo hübsch, dasäs värücht hübsch ischt.

(*Schi rükänd nöhar zämä.*)

VIÄRTÄ: - So hübsch?

DRITTÄ (*grummelät zerscht äswas wo mä nid värachteid*): - Was?

VIÄRTÄ: - Nei, das hani gsee.

ZWEITÄ (*gäid zum Erschtä, packnä an dä Handglenk und bücktschi uf einäm Bei – macht äswas wiä än Schwalbä*): - Miär chönntänisch äso häräschtelä, luäg. Häräschtelä und nisch di ganz Ziit nid bewegä?

(*Där Erscht macht där Zweit naa und zämä bildäntsch än sümetrischi Form.*)

DRITTÄ: - Das würdi heissä, än lebendigi Skulptur?

ZWEITÄ: - ja.

VIÄRTÄ: - Das heds schon gään.

DRITTÄ: - Das heds gään, ja.

(*Där Zweit und där Erscht schtreckänd schi und göönd än Schritt usänand.*)

ZWEITÄ: - Miär chönntänd biispiilswiis Fottänä zeigä, abär söttig...wa nid van ünsch sind.

DRITTÄ (*gwundrig*): - Frömdi Fottänä?
 ZWEITÄ: - Ja, mä chönntäschä da und dött zämä suächä...
 DRITTÄ: - I vārschtahn. Das gids abār schon.
 VIÄRTÄ (*chund nöhör*): - Das gids, hans sälbār schon gmacht.
 DRITTÄ: - Und wemār...di ganz Galerii uusmässä würtänd. Alls berächnä – (*geid dürr t'Rüüm*) d'Schteckdosä, wiäväl das därva gid...
 ZWEITÄ: - Beurteilä?
 DRITTÄ: - Das heds schon gään.
 VIÄRTÄ: - Vilicht äswas an där Dili?
 DRITTÄ: - An där Dili – (*lachät*) än Skulptur an där Dili?
 ZWEITÄ: - An där Dili?
 ERSCHTÄ: - Undär där Dili.
 (*Schi suächänd wiitär naa Inspirāzion an där Dili.*)
 DRITTÄ: - Und wemār nisch undär där Dili uufheichä tetänd?
 ZWEITÄ: - Ünsch uufheichä?
 DRITTÄ: - Heichä.
 ZWEITÄ (*weis was är seid*): - Das heds schon gään.

VIÄRTÄ: - Miär chönntänd äs Schtipendium für Chünschtlār gründä, dassch nüüd mee tüänd, abār au das heds schon gään.
 ZWEITÄ: - Das heds schon gään. Ja...ja. Und wemār äswas berächnä tetänd, dasschi denn ussärschtelä teeti, das äs nid würlki so ischt wiäs jezz ischt? Das heisst zum Biispiil, das...där Ruum, wa miär sind, das där gar nid da ischt. Är weer äswannä andärscht.
 DRITTÄ: - Das heds schon gään.
 ZWEITÄ: - Heds das schon gään?
 DRITTÄ: - Gwüss. Abār loss zuä, miär chönntänds äsoo aaschtelä, das das...das das, wa miär gseend, nid äso wichtig ischt wiä das, wa miär nid gseend.
 (*Schi sind läbhāft.*)
 ZWEITÄ (*chraztschi am Bei*): - Än vārschtekti Schicht?
 VIÄRTÄ: - Äs gragaar uusgschöpfts Teemä. Das heds schon gään.
 (*wiä äm vārgitzlā chreisändsch um d'Wand.*)

ZWEITÄ: - I würdi äswas uss Escht machä. Uss Brügäli. Uss äso chleinä...
 DRITTÄ (*undärbricht dän Zweit*): - Uss Eschtli heds schon äswas gään.
 (*Dr Zweit ischt iivārschtandä.*)
 DRITTÄ: - Loss zuä! Neonröhrä!
 ZWEITÄ: - Neonröhrä?
 DRITTÄ: - Ja, vilicht äswas uss Neonröhrä...
 ZWEITÄ: - Uss Neonröhrä. Äch nei, uss Neonröhrä heds schon äswas gään.
 DRITTÄ: - Uss Neonröhrä heds äswas gään?
 VIÄRTÄ: - Vilicht äswas Teeatär?
 ZWEITÄ (*ohni Begaischtärig*): - Teeatär heds gään.
 DRITTÄ: - Teatär heds gään, gwüss. Irgänd äswas...
 ZWEITÄ: - Äs hed sogar äs Teatär nid imä Teeatär gään, weischt? Miär chönntänd äswas Änzezlichs zeigä mit Hülf va ganz...uu-schuldignä Mittäl...
 ERSCHTÄ: - Wiä das?
 ZWEITÄ: - Ja, du zeigst ...zum Biispiil Zündhölzär...und äswas, wa liicht brinnt.
 ERSCHTÄ: - Soo ärzelärisch?
 VIÄRTÄ (*schtudiärt*): - Das heds schon gään. Hani gsee. I bin jetz in...(zündätschi än Zigärettä an).

VIÄRTÄ: - Und wemār alls wiis schtrichä tetänd?
 DRITTÄ: - Äs ischt doch schon alls wiis.
 VIÄRTÄ: - Abār dän Bodä au wiis.
 DRITTÄ: - Das heds schon gään.
 ZWEITÄ: - Das heds gään.
 VIÄRTÄ: - Und übärhopt alls wiis, au ünsch wiis!
 DRITTÄ: - Das heds au schon gään.
 ERSCHTÄ: - Ähä.

ENDE